

04 MAR 1999

Brunei-lawat

PUTERA MAHKOTA BRUNEI MULAI LAWATAN KE M'SIA SABTU

KUALA LUMPUR, 4 Mac (Bernama) -- Putera Mahkota Brunei Darussalam, Pengiran Muda Haji Al-Muhtadee Billah Ibni Sultan Hassanal Bolkiah akan melakukan lawatan rasmi lima hari ke Malaysia mulai Sabtu ini di atas lawatan Perdana Menteri Datuk Seri Dr Mahathir Mohamad.

Ini adalah lawatan pertama beliau ke luar negara, menurut kenyataan Wisma Putra di sini hari ini.

Beliau akan diiring oleh adindanya, Pengiran Muda Haji Abdul Azim dan sepupunya, Pengiran Muda Abdul Qawi Ibni Pengiran Muda Mohamed Bolkiah.

Rombongan itu termasuk para pegawai kanan kerajaan Brunei.

Lawatan itu akan bermula di Pulau Pinang di mana tetamu diraja itu akan melawat kampung budaya dan jambatan yang menghubungkan pulau ke tanah besar Semenanjung.

Wisma Putra berkata putera mahkota itu akan tiba di ibunegara pada hari Ahad.

Beliau dijadualkan mengunjungi Datuk Seri Dr Mahathir Mohamad, Timbalan Perdana Menteri Datuk Seri Abdullah Ahmad Badawi dan Menteri Pendidikan Datuk Seri Najib Tun Razak.

Beliau akan mengadap Yang di-Pertuan Agong Tuanku Ja'far dan Raja Permaisuri Agong Tuanku Najihah. Baginda Berdua juga akan meraikan rombongan diraja itu ke satu santapan tengah hari.

Atur acara lawatan itu termasuk lawatan ke Menara Berkembar Petronas dan Menara Kuala Lumpur.

Al-Muhtadee akan melawat Unit Perancang Ekonomi di Jabatan Perdana Menteri dan Institut Diplomasi dan Hubungan Luar.

Putera mahkota itu juga akan mengadakan perlawanan badminton persahabatan bersama para pemain badminton negara di Akademi Badminton Malaysia di Cheras.

Lawatan diraja itu berakhir pada hari Rabu.

-- BERNAMA

MAM WAT